

〈雨溪吟草〉

近體

1. 〈遊羅東林場〉

一路穿林徑，孩童雀躍行。明光流樹影，碎葉伴歌聲。
柢固牆磚起，魚游水鳥驚。尤其耽木浴，直教忘歸程。

2. 〈觀箏〉

顛搖乘勢上，放眼向雲端。左右飄風急，來回冷霧寒。
居高心忐忑，視下意盤桓。一線縈歸夢，曾觀海宇寬。

3. 〈溪邊草〉

鬱鬱溪邊草，朝枯夕見榮。長晴炎老葉，偶雨潤新萌。
既灌園中菜，兼涵道側英。幽香從七里，滿溢蝶花清。

庚子立秋已過，暑氣仍熾，野生七里香、野薑花等蓋因園中菜蔬，得旁澤而保青翠。

4. 〈走仁山步道〉

晴初連雨散，早發越蘭溪。婉婉仁山秀，離離蔓草萋。
迎光游苑囿，踏蘚步磬梯。一路歸來處，無暇不洗泥。

冬日陰雨月餘，轉晴，走仁山步道，階梯未乾。

5. 〈聖母朝聖地〉

緩緩循階上，青翎躍樹鳴。遙遙飛白練，粉粉綻初櫻。
翠攬山光影，瓊懷溪水聲。莊園拾靜穆，可以寄餘情。

冬初，走聖母朝聖地暨五峰旗瀑布步道，近觀藍鵲飛躍，賞清林溪聲。

6. 〈細雨初聞〉

霧雨似煙塵，山光隱約新。初聞梅韻暗，欲折恐傷春。

辛丑冬，強寒流過，乍晴細雨，校園梅開。

7. 〈走望龍埤飛龍步道〉

青山梯直上，宛轉若龍伸。盡擁湖光碧，櫻開一點春。

8. 〈元日〉其一

正日晴時雨，雨中見白花。花纖輕雨間，薄霧籠新紗。

9. 〈元日〉其二

雨裡行春不易前，紛持麗傘過青田。輕痕只看濛龜嶼，水墨橫天抹谷煙。

10. 〈春徑〉

曲徑橫山腹，石溪淥水聲。循光雖有路，或可任迷行。

正月初四，自行山徑。

11. 〈曇花〉

璞玉含英飄羽葉，岩坡獨立絕塵埃。幽微自賞隨風雨，恣意瓊花一夜開。

辛丑夏，家旁溪坡見曇花將綻，呼兒女觀之，喜等當夜，惜孩童早睡，余獨賞之。

12. 〈畫〉

執筆游移無處下，端詳乃父坐如鐘。雙幽吐霧承天險，一谷懸河納劍鋒。
細目重頤唇耳厚，貧眉亂鬢髮鬚茸。瘞瘡蛀齒繁星播，畫我拙顏換笑容。

女兒執筆欲作畫而無緒，慰之以乃父為題，後仔細端詳，先畫鼻兩孔，再畫雙目如黑豆，齒不齊而蛀，滿面瘡創，髮刺膚黑，醜態畢露。作品既成，相視而笑。

13. 〈聞失孤重逢有感〉

孩提離父母，一別廿四秋。萬里尋兒路，三更責己尤。
途窮言不愧，訊至豈無憂。淚擁終相見，餘生訴喜愁。

讀電影失孤原型故事郭先生父子重逢事有感。

14. 〈秋分白露間〉

雲蒼暮近山層煙，子女觀園引我牽。夜飯夕顏香馥馥，野蓼霞色葉連連。
清溪寒水輕雙足，淺谷微風卸兩肩。信步談天尋謐靜，瓜棚豆架綠籬邊。

日將入而偕小女兒菜園澆溉，紫茉莉發淡雅幽香。日前與子栽植山藥已滿棚架，節氣前颱風遠颺，乾涸溪水復滿溢，與兒女共同踩水，二童戲水歡笑，美如畫卷。

15. 〈中秋〉

可待缺成圓，連晴碧夜天。黃昏圍慢火，白晝戲流涓。
啼笑童顏上，欣戚鶴髮邊。春秋三五夜，總是喜憂全。

16. 〈冬至前夕〉

新寒催日短，晦極感陽生。浸糯研柔粿，搓丸作蜜羹。
金銀圓宛轉，大小聚無爭。節氣才將至，來春意已萌。

17. 〈大寒連雨步行歸家〉

晡時緩步殘冬雨，冷溽橫侵足履針。趕月流星簽上鼓，朝洋怒馬澗中吟。
雲嵐漸下悠山隱，日照將窮近徑森。料想迎門歸意振，無虞冷暖入衣襟。

18. 〈元宵前夕〉

元宵前夕氣輕寒，豆架瓜棚竹影闌。欲向孩兒陳典故，提燈卻顧盡探看。
壬寅元宵前，月將望而暫霽，偕兒女舉燈中庭，體驗乃父兒時記憶。

19. 〈小滿〉

小雨絲絲溪澗滿，輕泥處處樹頭繁。相從折葉隨流水，盡看花蟲待鳥喧。

20. 〈短雨〉

林鐘久炙需天水，向晚頻聞遠震聲。拂面風芒潮氣至，須臾解雨潤群生。

21. 〈中元前後〉其一，前夜。

丙夜明纖魄，觀山盼流星。雲稀光照澈，樹影湛空庭。

22. 〈中元前後〉其二，當夜。

銀河漸隱飛光滿，伏末新秋暑未消。島影沉沉天境闊，漁光曖曖海陬遙。
樓台獨望詩情抑，里谷群鳴夜韻寥。此月曾吟今自賞，游思一路上青霄。

23. 〈秋分〉

歸園忙灌溉，落日迫層巒。晚照猶殘暖，風來已覺寒。

24. 〈重陽前夜〉

玉缺南山淡照堂，吟秋泣露韻深長。憑燈欲讀風梳葉，未落先凝薄醉妝。

古體

25. 〈小船〉

夏至未至早鳴蟬，昨夜陣雨水沛然。教兒剪黏紙食器，壘石流緩放小船。

26. 〈廟會〉

梨園試鼓喧彩棚，鼎鑊鏗鏘置案聲。廟慶人情最豐處，萬事俱備禮未成。

27. 〈中元雜感〉

牛寮溪畔落陽斜，探手彎腰訊果花。蹲踞除蕪頻挹注，朝迎曦風夕晚霞。
四時各有茄葵豆，紫芋青蔬碧絲瓜。每望佳節休沐日，行囊食貨載滿車。
只為今日離去後，便少一次再歸家。

28. 〈村貓〉

家外有狸奴，三足通體烏。時時喚妻小，無懼村人呼。
殘糜可溫飽，冷暖道相濡。嗷嗷藏車下，風雨不忍驅。
廟埕旗風飄，將晚蟬未消。山羌啼徹谷，孩兒唱童謠。
嬉戲忽失足，坐地泣聲嘹。慰語皆說盡，懷抱找村貓。

詞

29. 〈風入松·庚子清明童戲〉

氣清微暖雨初停，攜手戲門庭。挽衣躡腳遊蔬圃，踏軟泥，澄葉苗青。
瓜下壟溝猶浸，晏如尋蝶追翎。
風鳶飛疾怕飄零，紛鬧且叮嚀。堂前重見當時燕，喜聞啼，簷舞輕靈。
春暮欣欣童語，目之皆盡娉婷。

30. 〈青玉案·辛亥元日〉

前宵別歲冬風渡，醒睡眠，聽兒語。著戴華衣相看顧，見言恭賀，展顏童趣，感稼軒詩句。
春行里廟尋鄉故，午後雲低去時路。野徑清塵林密處，臘梅寒色，素烟徐聚，雨裡山先暮。

註：辛棄疾詩〈元日〉：「老病忘時節，空齋曉尚眠。兒童喚翁起，今日是新年。」

詞格依欽定詞譜：

(◎本仄可平，○本平可仄，○平，●仄，■仄韻，□平韻。)

風入松(吳文英·畫船簾密不藏香)

●○○●●○□，○●●○□。●○●●○○●，●●○，○●○□。
○●○○○●，●○○●○□。
○○○●●○□，○●●○□。○○○●○○●，●○○，○●○□。
○●○○○●，●○○●○□。

青玉案(賀鑄·凌波不過橫塘路。)

◎○○●○○■，●◎●，○○■。◎●◎○○●■，◎○◎●，◎○◎■，◎●○○■。
◎○○●○○■，◎●○○●○■。◎●◎○○●■，◎○◎●，◎○◎■，◎●○○■。